

AQUILEE: SAGRE DI POPUI

L'ocasion uficiâl e jere di ricuardâ i 16 secui dal prin Concili di Aquilee (381) e i 6 secui de muart dal grant legisladôr Marquart di Randeck, patriarcje de Patrie (1381). Ma la int e je vignude, o crodin, par altris conts. Parcè che Aquilee, centenaris o no centenaris, e clame, e la int si sint di cjase, a cjase.

Il spettacul de basiliche incolme, il sflandôr e la solenitât des ceremoniis e dai vescui e predis concelebrants, il cjant che te sô semplicitât e coralitât ti faseve vignî i sgrisui, sintî a preâ e a cjantâ in cuatri lenghis e capî che si è fradis cun dutis lis stangjis che o vin dulintôr, la sagre de grande place, la ligrie di int diferent che si sint di vê une lidrîs cumuniâl no parturide des fantasimis di un mat o de prepotence di un trist ma scaturide dal grim de storie, di chest cjanton-crosere de Europe.

Cheste e je Aquilee e chest al è stât l'avot di sant Ermacure ai 13 di lui. Si è dade dongje propit chê int che e vares vût milante resons par dineâsi il bundî par gjavâsi i vôi e che altris a àn saborât par secui propit cul fin di dividinus un dal altri. Cun dut chest, la lûs dal Patriarcjât no à lassât smavî cheste flame di fraternitât, di fede, di amicizie, di buine armonie che le sintin te fonde dal nestri vivi uman e cristian.

Nissun no si è sintût forest; nissun no si è sintût butât di bande; nissun nol à viodût in chel dongje un nemî. La grande lezion e je propit cheste union che e salte spaltadis e cunfins e assis e a rive adore di cjapâ dentri, a paritât, Furlans, Todescs e Sclâfs. E ancje Talians.

O varessin tancj parcês, nô Furlans, par tornâur la farine a di chêi che nus àn stiçâts a jessi triscj e a lâ in rotis cun chêi che o vevin dut il tornecont glesiastic, culturâl, economic e ancje pulitic a stâ in buinis. Ma a Aquilee si passe parsore, e si pree, si cjante, si gjolt di fradis.

Il vescul di Augsbùrc, l'arcivescul di Lubiane, i vescui de regjon furlane e di Triest nus àn dât un spieli di ce che e je stade la nestre Glesie Patriarcjâl: moment di union, element di coesion, risultive di armonie e di convivenche che culî, te crosere, e veve dutis lis resons par diventâ impussibil.

Il vescul Stimpfle, bavarês, al à batût afuart su l'Europe dai popui, che se no je Europe ancje dai popui piçui e je dome une conclave di Stâts fuarts par scjafoiâ miôr i debui.

In merit de fieste di sant Ermacure, o podìn strucâ chest:

- l'avôt dal Friûl la int lu sint ta l'anime e al cjaparâ simpri plui pît. La strade e je juste;
- l'armonie, l'amicizie e la clime di fradis a saltin fûr bessolis, tun mût che al è un spetacul;
- i cjants, ben direzûs e tignûts sù dai cinc coros, a àn fat tornâ a cercâ il savôr de anime furlane. Un cjant che al rive adore di tignî sù un popul ancje "ad ôr dai flums di Babel";
- i vescui, dal '76, no àn vût il coragjo di vignî. Cheste volte a àn cirût di comedâ la falope, ancje se il celebrant principâl al à talianât sù une predicje universâl tipo «Apemaia». Ma la int ur perdone, se le àn capide di stâ cun nô;
- il sindic di Aquilee al à di lassâ dutis lis bandieris, ancje chê di chel popul che lui, a cjacare, al dîs di difindi. Lôr a son pe difese globâl, e alore ur pâr di vê dirit di scjafoiâ i segnos "parziâi", sicu la bandiere dal Friûl;
- par chel che al rivuarde i cidulârs di Çurçuvint, che no àn podût trai lis cidulis, consideradis pericol public, o voessin dome domandâi a l'autoritât competent cui che al dà il permes a Rome o a Milan di dâ fûc a lis machignis e di fracassâ dut par manifestâ la grande libertât taliane. Pussibil che dome lis nestrîs usancis a sedin "pericol public"? Ma sun chest o tornarìn, ripuartant lis raganicis e une riute di coment.

Insome, in barbe a ducj i basoâi e i profetis di sventure, il Friûl al torne a ripiâ il so snait e la sô gole di vivi e di sflorî. Ancje in grazie di chêi sants Ermacure e Furtunât che par prins a àn imbombât cul lôr sanc cheste tiere.

Articul gjavât de La Patrie dal Friûl di Lui e Avost dal 1980, n. 7 - 8